



NAFARROAKO PARLAMENTUKO

ALDIZKARI OFIZIALA

VIII. legegintzaldia

Iruña, 2014ko apirilaren 16a

56. ZK.

A U R K I B I D E A

B SAILA:

Foru lege proposamenak:

- Foru Legea, Diru-laguntzei buruzko azaroaren 9ko 11/2005 Foru Legea aldatzen duena. Osoko Bilkurak onetsia (3. or.).
- Foru Legea, kreditu-erakundeetako gordailuen gaineko zergari buruzkoa. Osoko Bilkurak onetsia (6. or.).
- Foru Legea, Nafarroako Toki Administrazioari buruzko uztailaren 2ko 6/1990 Foru Legearen 223. artikulua aldatzen duena. Osoko Bilkurak onetsia (9. or.).
- Foru Lege proposamena, Nafarroako administrazio publikoen montepioetako funtzionarioen eskubide pasiboen araubide iragankorrari buruzko martxoaren 5eko 10/2003 Foru Legea hein batean aldatzen duena. Osoko Bilkurak aintzat hartua (10. or.).
- Foru Lege proposamena, Nafarroako administrazio publikoen montepioetako funtzionarioen eskubide pasiboen araubide iragankorrari buruzko martxoaren 5eko 10/2003 Foru Legea hein batean aldatzen duena. Zuzenketak aurkezteko epea (11. or.).

E SAILA:

Jabeldurak, mozioak eta adierazpen politikoak:

- Erabakia. Horren bidez, Nafarroako Gobernua premiatzen da eskualdeko udaletako arduradunekin bilera egin dezan, neurri urgenteak zehazteko, N-121-A errepidean istripu kopurua murrizte aldera. Osoko Bilkurak onetsia (12. or.).
- Erabakia. Horren bidez, Nafarroako Gobernua premiatzen da Nafarroako memoria historikoaren tokien katalogoa sor dezan eta Sartagudako Memoriaren Parkea lehenbizikoa izan dadin Nafarroako memoria historikoaren toki deklaratu izaten. Osoko Bilkurak onetsia (13. or.).
- Erabakia. Horren bidez, Nafarroako Parlamentuak ezinbestekotzat jotzen du fundazioen kenteak eraginik ez izatea auditoriak egiteko premian eta betebeharrean, eta Nafarroako Gobernua premiatzen du Kontuen Ganberaren esku jar dezan dagoen informazio guztia. Osoko Bilkurak onetsia (13. or.).
- Erabakia. Horren bidez, Nafarroako Gobernua premiatzen da azter dezan Belaten barna Iruñetik Frantziara doan N-121-A errepideko tarte osoa bikoizteko aukera. Osoko Bilkurak onetsia (14. or.).
- Erabakia. Horren bidez, Nafarroako Gobernua premiatzen da Trenasa enpresaren eta trenbide-sarearen arteko lotura-trenbideak ukitutako familien etxebizitzak eros ditzan. Osoko Bilkurak onetsia (14. or.).

—Erabakia. Horren bidez, Nafarroako Gobernua premiatzen da ehuneko ehun finantza ditzan haur hezkuntzako lehen zikloko udal titulartasuneko eskolak. Osoko Bilkurak onetsia (15. or.).

G SAILA:

Txostenak, deialdiak eta Parlamentuko informazioa:

—Nafarroako Parlamentuko ordezkariak izendatzea Memoria Historikoaren arloko Koordinazio Batzorde Teknikoan (16. or.).

B saila:
FORU LEGE PROPOSAMENAK

Foru Legea, Diru-laguntzei buruzko azaroaren 9ko 11/2005 Foru Legea aldatzen duena.

OSOKO BILKURAK ONETSIA

Nafarroako Parlamentuak, 2014ko apirilaren 10ean egindako Osoko Bilkuran, Diru-laguntzei buruzko azaroaren 9ko 11/2005 Foru Legea aldatzen duen Foru Legea onetsi zuen.

Legebiltzarreko Erregelamenduko 146. artikuluan ezarritakoa betez, argitara dadin agindu da.

Iruñean, 2014ko apirilaren 10ean

Lehendakaria: Alberto Catalán Higuera

Diru-laguntzei buruzko azaroaren 9ko 11/2005 Foru Legea aldatzen duen Foru Legea

ZIOEN AZALPENA

Ukaezina da gobernuak kanpoko erakundeek garrantzi handia dutela krisi testuinguru honetan. Nafarroako errealitate sozialari buruz duten ezagutzatik abiatuta, lan paregabea egiten dute, ez soilik solidaritate-balioen prestakuntzari dagokionez, ezpada zailtasunak dituzten pertsonen lagun egiteari dagokionez ere.

GKE-en lan-esparrua oso zabala eta askotarikoa da, garapenerako lankidetzaren arloko lanetik hasi eta ezgaitasun motaren bat duten pertsonen bizi-kalitatea hobetzen saiatzen diren erakundetaraino, gizarte-bazterketako egoeran dauden pertsonekin lan egiten duten gizarte-entitateetatik pasatuta.

Hortaz, erkidego honetan eta une honetan, gizarte-entitateen sektorea esparru estrategiko bat da, gizarte-, giza eta ekonomia-garrantzi handia duenez babestu eta sendotu beharra dagoena.

Edozein estamenturentzat garrantzitsuak dira laguntza publikoak, haien kantitatea, egonkortasuna eta iraunkortasuna, baina are garrantzitsuagoak dira, hil ala bizikoak, gisa honetako

gizarte-entitateentzat, garatutako elkartasun-lana eraginkorra izanen bada.

Hortaz, diru-laguntzen eta laguntza publikoen deialdian egonkortasuna beharko litzateke urte urte laguntza horiek emateko datari dagokionez, entitate horien plangintza bateragarria izan dadin egiten duten lanarekin eta ematen dituzten zerbitzuekin. Ezin da egon gaur gertatzen denaren moduko desfase handia, ezin da gertatu martxoan oraindik egin gabe egotea zenbait diru-laguntzaren deialdiak eta beste zenbait ebatzi gabe egotea, zeren egoera horrek ezegonkortasun eta ziurgabetasun ekonomikoa sortzen baititu, eta ezin dugu ahantzi ziurgabetasun horrek eragina daukala entitate horiek ematen dituzten prestazioen eta martxan jartzen dituzten neurrien kalitatean. Sektore honek Nafarroan duen garrantziari buruzko oinarritzko adostasuna baldin badago, garrantzi horren arabera finantzaketa-sistema bat eduki behar dugu.

Azterketa eta analisi ugari bat etorririk adierazten dute Gizarte Ekintzako Hirugarren Sektoreko (GEHS) entitateak diruz laguntzeko Administrazio Publikoak baliatzen duen sistema desegokia eta eskasa dela, eta ez dela egokitzen errealitate-ara eta sektore horrek azken hamarkadetan izandako bilakaerara, eta hori oztopo oso handia da sektorearen garapenerako. Finantzaketa desegoki hori erakundeek gure gizarteko pertsona ahulenei ematen dizkieten zerbitzuen kalterako da, eta horrek konparaziozko bidegabekeria bat dakar bestelako entitate batzuekin alderatuz gero. Egungo krisi egoeran, finantzaketa arazo egiturazkoak larritu eta are gehiago geratu dira agerian, ahal bada; izan ere, zerbitzuak eta programak gainezka egiten ari dira, halako moduz non gizarte entitateek zabaldu eta areagotu egin behar baitute ematen duten arreta, eta dituzten finantzabideak, aldiz, murriztu eta prekarizatu egiten baitira.

GEHsko entitateek era jarraituan egiten dituzten jardueretatik asko, interes publikokoak izateaz gain, behar-beharrezkoak dira gizartean; izan ere, pertsona ahulenen sustapenera bideratuta daude, oinarrizko beharrienei erantzuten diete, eta gizarte zerbitzuekiko eta bestelako zerbitzu publikoekiko lankidetzan estuan gauzatzen dira. Hala ere, denboran zehar sendotu eta eraginkortasuna erakutsi arren, eta Administrazioak berak eta gizarteak premia bizikotzat hartu arren, praktikan baldintza prekarioetan jardun behar izaten dute, batzuetan etenak eginez, deialdien atzerapena dela-eta, denbora aldetiko zalantzenatik eta kudeaketa-baldintza eta administrazio-kontrol desegokiagatik.

GEHsk hazkunde garrantzitsua izan du azken urteotan, bere jardueren kalitatea hobetu egin da, Administrazioekiko lankidetzan gero eta estuagoa da, eta bere eginkizun soziala ezinbestekoa da. Hala ere, garatzen dituen jarduerak finantzatzeko formula egokirik ez aurkitzeaz gain, egun dauden konplexuago egin dira, eta, ondorioz, gero eta zailagoa da proiektuen bideragarritasuna.

GEHSari eta horrek gauzatzen duen jarduerari egokitutako legedirik edota indarrean dagoen foru legeari egokitutako arau-garapenik ez izatearen ondorioz, Administrazioaren eta gizarte entitateen arteko harremana, askotan, baldintzatuta egoteaz gain, diru-laguntzak eskuratzeko eta justifikatzeko administrazio-prozeduren kontrolera murriztuta geratzen da. Lehenetsuna ez du elkarlanak, helburu komunak lortzeko lankidetzak, non bi aldeek elkarrekin jarduten duten eta ahalegina egiten duten, ezta azken onuradun izanen diren pertsonen ikuspegiak eta haien beharriaz arduratzen diren pertsonen ikuspegiak ere. Aitzitik, gastuaren kontrola da dena baldintzatzen duena, eta administrazio-komplexutasuna eta burokratizazioa gero eta handiagoak dira; hori oztopo bihurtzen da entitate txikiek diru-laguntzak eskuratu ahal izateko, eta, horretaz gain, gastuak areagotzen ditu, efizientzia murrizten du eta azken helburua bistatik galtzea eragiten du.

Zorpetze-ratioa oso txikia bada ere, hamar entitatetik seik onartzen dute likidezia arazoak dituztela. Datu horrek adierazten du entitateek egoera ekonomiko saneatua dutela, baina kezkatzekoa da, kontuan hartzen badugu likidezia arazoak dituzten entitate askok beren burua behartuta ikusten dutela hornitzaileei eta langileei egin beharreko ordainketak atzeratzera, edota beren jarduerak atzeratzera. Horrekin lotuta, egiaztatzen da horietatik ehuneko 40 baino gehiagok mailegu edo kreditu pertsonalak eskuratzen dituztela.

Likidezia arazoaren ondorioz, entitateek bi zailtasun mota izaten dituzte: alde batetik, kredituak eskuratzeko, batzuetan entitatearen sustatzaileen ondasunen abalarekin –Administrazioak ez ditu bere gain hartzen kreditu horien kostu finantzarioak, eta, hala, gehiegizko arriskuak, beharrezkoak ez direnak, areagotu egiten dira–, eta, bestetik, kredituak eskuratzeko zailtasunak, finantza-entitateek aplikatzen dituzten arriskubalorazioko sistemak ez daudelako sektorearen errealitateari egokituak. Eta horixe bera gertatzen da abalak izatea beharrezkoa denean. Ez da lanik egin Administrazioaren eta finantza-entitateen artean akordioak lortzeko, gizarte-entitateei likidezia errazte aldera, horrela entitate horiek ordainketak egitean duten atzerapena zuzen dezaten. Horretaz gain, sektorearen beharriaz arduratzen diren entitateen errealitateari egokitutako tresna finantzarioak falta dira.

Hori dela eta, foru lege honen xedea da Foru Komunitateko Administrazioak gizarte-entitateei ematen dizkien diru-laguntzen izapidetzea, epeak eta ordainketa arintzea eta erraztea, edozein entitatek kontuak emateko oro har duen betebeharra bazter utzi gabe.

1. artikulua. Diru-laguntzei buruzko azaroaren 9ko 11/2005 Foru Legeari 5. bis artikulua berri bat gehitzen zaio:

“5. bis artikulua. Plangintza.

1. Nafarroako Foru Komunitateko Administrazioak diru-laguntzen plan estrategiko orokor bat ezarriko du hiru urtetik behin, departamentuen eta jarduketan lortzeko arabera xehakaturik. Plan horrek, onetsia izan aurretik, arlo ekonomikoan eskumena duen departamentuaren baimena lortu beharko du.

Diru-laguntzen plan estrategiko hori urtero berrikusiko da, eta bertan gehituko dira beharrezkotzat jotzen diren aldaketak edo doikuntzak.

Diru-laguntzen plan estrategikoa Nafarroako Parlamentuko ekonomiaren arloko batzorde eskudunari aurkeztu beharko zaio urtero, apirilaren 30a baino lehen.

2. Urte bakoitzeko lehen lauhilabetekoan, departamentu eta erakunde autonomoek aurreko ekitaldiko deialdien ebaluazio-txostenak prestatuko dituzte. Txosten horietan aztertuko dira deialdi bakoitzean banaka planteatutako helburuen beteetzea eta diru-laguntza emateko prozeduran ezarritako epeen beteetze-maila, bai eta deialdiei lotutako gai garrantzitsuak ere.

3. Aurreko idatz-zatian aipatzen diren txostenak Nafarroako Gobernuako departamentu bakoitzaren dokumentu gisa igorriko zaizkio, onetsi ondoren eta ezarritako epearen barruan, Nafarroako Parlamentuan ekonomiaren arloko eskumena duen batzordeari.”

2. artikulua. Aldatu egiten da Diru-laguntzei buruzko azaroaren 9ko 11/2005 Foru Legearen 14. artikulua, eta 4. idatz-zati berri bat gehitzen zaio:

“4. Oinarri arautzaileetan ezarritako ordainketa-epetak betetzen ez badira, onuradunek Nafarroako Foru Komunitateko Administrazioari eskatu ahalko diote diruaren legezko interesa ordaintzeko.

Halaber, ez-betetze horren ondorioz galerak edo ondorio ekonomiko negatiboak eragiten baldin badira finantzatutako proiektu, ekintza, jokaera edo egoerarako, onuradunek Nafarroako Foru Komunitateko Administrazioari eskatu ahalko diote kalte horiek ordaintzeko.

Onuradunek behar bezala frogatu beharko dituzte ez-betetzeak eragindako kalte ekonomikoak.”

3. artikulua. Aldatu egiten da Diru-laguntzei buruzko azaroaren 9ko 11/2005 Foru Legearen 17. artikulua, eta 3. eta 4. idatz-zati berriak gehitzen zaizkio:

“3. Diru-laguntzak emateko prozedurak, oro har, urte bakoitzeko urtarrilean zehar hasi beharko dira, eta gehienez ere hiru hilabeteko epean amaitu, diru-laguntza horiek emateari buruzko ebazpenak emanez, behar bezala justifikatutako kasuetan izan ezik; justifikazio hori urte bakoitzeko otsailaren 28a baino lehen frogatu beharko da, ekonomiaren arloaz arduratzen den Nafarroako Parlamentuko batzordearen aurrean.

4. Gizarte ekintzako entitateentzako diru-laguntzen kasuan, horiek emateko prozedura urte bakoitzeko urtarrilean hasiko da, eta organo eskudunak diru-laguntza emateko ebazpena urte bakoitzeko martxoaren 31 baino lehen eman beharko da.”

4. artikulua. Aldatu egiten da Diru-laguntzei buruzko azaroaren 9ko 11/2005 Foru Legeko 33. artikulua. Hona testu berria:

“33. artikulua. Diru-laguntzen aurrerapena.

1. Arau orokor modura, aldeztu aurretik ordainduko dira irabazi asmorik gabeko entitateei edota horien federazio, konfederazio edo elkarteei ematen zaizkien diru-laguntzak, gizarte ekintzako proiektu edo programak finantzatzera bideratuak, baldin eta diruz lagundutako jardueraren gauzatzeari aldi baterako finantzatzeko baliabide nahiko-

rik ez badute eta inguruabar hori behar adina frogatzen badute.

Aurrerakinak modu honetan ordainduko dira:

a) Emandako diru-laguntza 60.000 eurokoa edo txikiagoa bada, ordainketa bakarrean ordainduko da, aurrerakin gisa, diru-laguntza emateko ebazpena ematearekin batera.

b) Emandako diru-laguntza 60.000 euro baino gehiagokoa bada, gutxienez bi zatitan ordainduko da: horietako lehena diru-laguntza ematea ebaztearekin batera, eta hurrengoa (edo hurrengoak) ebazpen horretan ezarritako epeetan edo epemugetan. Zatitutako ordainketa bakoitza ez da izanen, inolaz ere, 30.000 euro baino gutxiagokoa, azkenean izan ezik, diru-laguntza osatzera arteko zenbatekoa ez bada kopuru horretara iristen. Nolanahi ere, beharrezkoa izanen da exekuzioari buruzko agiri bidezko justifikazio ekonomikoa aurkeztea, aurretik ordaindutako zenbatekoari dagokiona, diru-laguntzaren hurrengo ordainketa egiteko.

2. Gainerako onuradunentzat, emandako diru-laguntzaren ordainketak aurreratu ahal izanen dira diru-laguntzaren oinarri arautzaileetan hori berraz aurreikusten denean soilik, oinarriok ezarritako muga, betekizun eta, hala egokituz gero, bermeekin, eta, betiere, diru-laguntzaren xedeak betetzeko funts-horniduraren beharra justifikatzen baldin bada.

3. Lehenengo idatz-zatian aurreikusten ez diren onuradunen kasuan, nahitaez ezarriko dira bermeak aurrerakinak 60.000 euro baino gehiagokoak direnean, hurrengo kasuetan salbu:

a) Onuraduna administrazio publiko bat edo sektore publikoko entitate bat denean.

b) Etengabeko prestakuntzako programetan kasuko eskubidea aitortua duten enplegu zentro berezietan defizita konpentsatzeko ordainak ematen zaizkienean.

4. Halaber, zilegi izanen da aurreko idatz-zatian aipatutako bermeak ez eskatzea “Nafarroako Lan Gatazkak Konpontzeko Epaimahaia” Fundazioari eta irabazi asmorik gabeko kultur entitateei, kasu bakoitzaren inguruabar bereziak kontuan izanik ogasun arloko kontseilari eskudunak erabakitako kasu zehatzetan.

5. Diru-laguntzen aurrerakinak oinarri arautzaileetan ezartzen diren epeetan justifikatu beharko dira, eta diru-laguntzen justifikazioari eta ordainketari buruz oro har adierazitako betekizun berberak bete beharko dira, foru lege honen 32. artikuluko 3. idatz-zatian aipatutako txostena barne dela.”

5. artikulua. Diru-laguntzei buruzko azaroaren 9ko 11/2005 Foru Legeari 33. bis artikulua berri bat gehitzen zaio:

“33. bis artikulua. Exekuzio-epeak.

Diruz lagundutako ekintzak gauzatzeko epeak zenbatzerakoan, oro har, diru-laguntza ematen duen ebazpenaren data hartuko da hasierako datatzat. Ekintza horiek gauzatzeko epeak hasieran emandako denbora halako bi luzatzen ahalko dira gehienez, oinarri arautzaileetan ezarritakoari baldintzetan.

Edonola ere, gizarte entitateak hala eskatzen badu, hasierako data, behin ebazpena jaso ondoren, diru-laguntza emateko ebazpena bera baino lehenagokoa izan daiteke, betiere deialdia egin den urte naturalaren barruan izanez gero”.

6. artikulua. Diru-laguntzei buruzko azaroaren 9ko 11/2005 Foru Legeari bi xedapen gehigarri berri gehitzen zaizkio:

“Lehen xedapen gehigarria. Finantza entitateekiko hitzarmenak.

Nafarroako Gobernuak, Gizarte Ekintzako Hirugarren Sektoreko entitateei likidezia izateko eta kredituak eskuratu ahal izateko erraztasunak emateko, lankidetzaz hitzarmenak sustatuko ditu Nafarroan jarduten duten finantza entitateekin”.

“Bigarren xedapen gehigarria. Gerakina.

Edozein arrazoi tarteko, esleitu gabeko gerakirik geldituko balitz Nafarroako Aurrekontu Orokorretan gizarte entitateetarako aurreikusitako diru-laguntzetarako kredituetan, premiazko deialdi bat onetsiko da aurrekontu-ekitaldi beraren barruan, foru lege honetan aurreikusitakoari jarraikiz”.

7. artikulua. Diru-laguntzei buruzko azaroaren 9ko 11/2005 Foru Legearen xedapen gehigarri bakarra hirugarren xedapen gehigarria izatera igaro da.

Azken xedapen bakarra. Indarra hartzea.

Foru lege honek Nafarroako Aldizkari Ofizialean argitara eman eta biharamunean hartuko du indarra.

Foru Legea, kreditu-erakundeetako gordailuen gaineko zergari buruzkoa.

OSOKO BILKURAK ONETSIA

Nafarroako Parlamentuak, 2014ko apirilaren 10ean egindako Osoko Bilkuran, kreditu-erakundeetako gordailuen gaineko zergari buruzko Foru Legea onetsi zuen.

Legebiltzarreko Erregelamenduko 146. artikuluan ezarritakoa betez, argitara dadin agindu da.

Iruñean, 2014ko apirilaren 10ean

Lehendakaria: Alberto Catalán Higuera

Kreditu-erakundeetako gordailuen gaineko zergari buruzko Foru Legea

ZIOEN AZALPENA

Zenbait autonomia erkidegok kreditu-erakundeetako gordailuen gaineko zuzeneko zerga bat arautu dute azken urteotan. Zerga horren zergapeko egintza da kreditu-erakundeek hirugarrenen funtsak atzitzea, edozein izaera juridikoz, eta funtsak itzultzeko betebeharrarekin. Kreditu-erakundeetako gordailuen gaineko zergari buruzko azaroaren 29ko 14/2001 Extremadurako Legea izan zen onetsitako lehena, eta aurkaratua izan zen

Konstituzio Auzitegian, zeinak, azaroaren 14ko 210/2012 zenbakiko epaiaren bidez, ezetsi egin baitzuen konstituziokontraotasun-errekurtsioa, esanez zerga horrek ez duela eragiten zerga-erazpen bikoitzik, ez balio erantsiaren gaineko zergari dagokionez, ez jarduera ekonomikoen gaineko zergari dagokionez ere, ez diela eragiten kapitalen joan-etorri askeari edo kokatzeko askatasunari, eta ez duela hausten lurraldez kanpoko ondasunak edo egintzak ez kargatzeko debekua. Geroago, Andaluziak (abendua 3ko 11/2010 Legea), Asturiasek (abendua 28ko 3/2012 Legea), Kanariar Uharteek (ekainaren 25eko 4/2012 Legea) eta Kataluniak ere (abendua 18ko 5/2012 Lege-dekretua) ezarri zuten zerga.

Azkenik, “finantza-sistemaren funtzionamenduan efizientzia handiagoa bermatzen duen tratamendu fiskal harmonizatu bat ziurtatzeko asmoz,” Finantza publikoak sendotzera eta jarduera ekonomikoa bultzatzera bideratutako tributu-neurriei buruzko abenduaren 27ko 16/2012 Legearen 19. artikulua kreditu-erakundeetako gordailuen gaineko zerga sortu zuen, 2013ko urtarrilaren 1etik aitzinako ondorioekin, Espainiako lurralde

osoan eska daitekeen zuzeneko zerga gisa, "Euskal Autonomia Erkidegoko lurralde historikoetan eta Nafarroako Foru Komunitatean hurrenez hurren foruetako zerga-araubide diren ekonomia-itunari eta ekonomia-hitzarmenari kalterik egin gabe."

Nafarroako Foru Eraentza Berrezarri eta Hobe-tzeari buruzko abuztuaren 10eko 13/1982 Lege Organikoaren 45. artikuluekin bat, Nafarroako zerga eta finantza jarduera hitzarmen ekonomikoaren tradiziozko sistemaren bidez arautzen da, eta Nafarroak bere zerga-araubideari eusteko eta hura ezarri eta arautzeko ahalmena du. Uztailaren 15eko 25/2003 Legearen bidez onetsitako Hitzarmen Ekonomiko indardunaren 2. artikulua ezartzen duenez, Nafarroako Foru Komunitateak ahalmena du hitzartutakoez bestelako zergak ezartzeko, baldin eta hitzarmenean jasotako harmonizazio irizpideak eta printzipioak errespetatzen badira; besteak beste, solidaritate printzipioa, benetako zerga-presio orokorra Estatuaren gaineko dagoenaren baliokidea izatea, pertsonen joan-etorri eta kokatze askatasuna eta Espainiako lurralde osoan ondasunek, kapitalek eta zerbitzuek libreki zirkulatzea, ondorio diskriminatzailek eragin gabe.

Xedapen horiek direla-eta, bidezkoa da Nafarroako Foru Komunitatearen esparruan sortzea eta arautzea bertako lurraldean jarduten duten kreditu-erakundeetako gordailuen gaineko zerga.

1. artikulua. Sorrera.

Kreditu-erakundeetako gordailuen gaineko zerga sortzen da, zeina foru lege honetan jasotako xedapenei jarraikiz arautuko baita.

2. artikulua. Zergaren izaera eta xedea.

Kreditu-erakundeetako gordailuen gaineko zerga, izaera zuzeneko tributu bat da, Nafarroako Foru Komunitateko lurraldean jarduten duten kreditu-erakundeetan jarritako gordailuak kargatzen dituena, foru lege honetan ezarritako moduan eta baldintzetan.

3. artikulua. Zergapeko egintza.

Zergapeko egintza da foru lege honen 6. artikuluan adierazitako zergadunek hirugarrenen funtsak mantentzea, mantentze horren izaera juridikoa zein ere den, eta funtsak itzultzeko betebeharra baldin badakar.

4. artikulua. Salbuespenak.

Honakoak daude zerga honetatik salbuetsiak:

1. Espainiako Bankua eta diru-arauketako agintariak.
2. Europako Inbertsio Bankua.

3. Europako Banku Zentrala.

4. Kreditu Ofizialeko Institutua.

5. artikulua. Zergaldia eta sortzapena.

Zergaldia urte naturala izanen da.

Halere, jarduera hasten bada Foru Komunitatearen lurraldean urte naturala hasita dagoenean, zergaldia izanen da jarduera hasi den egunetik urte naturala bukatu bitartekoa.

Zergaldia betiere bukatuko da zergadunak Nafarroako Foru Komunitatean jarduteari uzten dionean.

Zerga sortuko da zergaldiaren azken egunean.

6. artikulua. Zergadunak.

1. Zergaren zergadunak izanen dira:

a) Kreditu Erakundearen alorreko indarreko Zuzenbidea Europako Erkidegoetakora egokitu beharri buruzko ekainaren 28ko 1298/1986 Legegintzako Errege Dekretuaren 1. artikuluan zehaztutako kreditu-erakundeak, Foru Komunitatearen lurraldean jarduten badute eta lurralde horretan eskuratzen badituzte hirugarrenen funtsak, bai bere egoitza nagusiaren bidez, bai lurralde horretako sukurtsal eta bulegoen bidez; betiere, itzultzeko betebeharrekin.

b) Atzerriko kreditu-erakundeek Foru Komunitatearen lurraldean dituzten sukurtsalak, jarduketa horiek egiten dituztenak.

2. Aipatu erakundeek ezin diete hirugarrenei inolaz ere jasanarazi zerga honen kuota.

7. artikulua. Zerga-oinarria.

1. Zerga-oinarria da zergaldiko hiruhileko natural bakoitzeko azken saldoaren batez besteko aritmetikoa egitetik heldu den zenbatekoa, kreditu-erakundearen balantzaren pasibo erreserbatuko 4. kontusailari –"bezeroen gordailuak", egoera-orri finantzario indibidualetan jasotakoak– dagokiona, Foru Komunitateko lurraldeko egoitza nagusiak edo sukurtsalek eskuratutako gordailuei dagokien zatian.

Horretarako, azken saldoari zenbateko hauek kenduko zaizkio: "Jaulkitako partaidetzak eta hipoteka-zedulak" izeneko 4.2.2.4. kontusailan jasotako zenbatekoak, bai eta 4.1.5., 4.2.5., 4.3.2. eta 4.4.5. kontusailtako "balorazio doikuntzak" gisa jasotako zenbatekoak ere.

2. Artikulu honetan aipatutako parametroak dira Espainiako Bankuak kreditu-erakundeei zehaztu zizkien abenduaren 22ko 4/2004 Zirkularreko II. tituluan eta IV. eranskinean; zirkular hori finantza-

informazio publiko eta erreserbatuko arauak eta egoera-orri finantzarioen ereduak buruzkoa da, eta, haren ordezkorik emango balitz, arau berriak jarraituko litzaioke.

8. artikulua. Zerga-kuota.

1. Kuota osoa zerga oinarriari ehuneko 0,03ko karga-tasa aplikatuz kalkulatu da.

2. Kenkari orokorrak. Erregelamenduz ezarritakoaren arabera kalkulatu ateratzen den kuotatik ondoko zenbatekoak izanen dira kengarriak:

a) Kuota osoaren ehuneko 40, baldin eta kreditu-erakundearen egoitza soziala Nafarroan bada.

b) 8.000 euro, Nafarroako lurraldean kokatuta sukurtsal edo bulego bakoitzeko; kantitate hori 30.000 euroraino igoko da baldin eta erroldaren arabera 2.000 biztanle baino gutxiagoko herrietan kokaturik badaude.

c) Aurrezki kutxen eta horien transformazioaren ondoriozko fundazioen gizarte-ekintzetara bideratuak, eta kreditu-kooperatiben hezkuntza- eta sustapen-funtsetara, betiere kasuan kasuko zergaldian Nafarroan benetan inbertituak izan direnean.

Aurrezki kutxek edo kreditu-kooperatibek kreditu-entitate batean partaidetza badute eta entitate horien bidez gauzatzen badute zeharka beren finantza-jarduera, edota kreditu-entitate horietan partaidetza badute aurrezki kutxen transformazioaren ondoriozko fundazioek edo kreditu-kooperatibek, aipatutako kreditu-entitate horrek ere, zergaren subjektu pasiboa delarik, aplikatzen ahalko du kenkari hori.

d) Kuota osoaren ehuneko 25, baldin eta subjektu pasiboa kreditu-kooperatiba bada.

e) Europar Batasuneko araudiko definizioaren arabera enpresa txiki eta ertainak nahiz autonomoak direnei ekitaldi bakoitzean emaniko zenbateko guztien ehuneko 2.

f) Nafarroako Foru Komunitatearentzat onura publikokoak edo gizarte-interesekoak diren proiektuetarako emaniko finantzaketa, edo lankidetzako publiko-pribatuko proiektuetarako emandakoa, proiektuok Nafarroako Gobernuak itunduak eta onetsiak baldin badira, edo, bestela, foru lege ezarritako proiektuetarako emandakoa.

3. Kuota likidoa izanen da tributu-kuotari artikuluko honetako 2. idatz-zatian ezarritako kenkariak aplikatuz heldu dena. Kuota likidoak ez du inolaz ere izanen 0 euro baino gutxiagoko baliorik, eta ezin baldin bada inolako kenkaririk aplikatu, kuota likidoa kuota osoaren berdina izanen da.

4. Kuota diferentziala izanen da egindako konturako ordainketak kuota likidoari kentzetik heldu den emaitza, zeina konpentsatu egin ahalko baita foru lege honetan ezarritako moduan, baldin eta likidaziotik ateratzen den tributu-kuota negatiboa bada, eta positiboa bada, likidaziotik ateratzen den kuotaren zati osoa bada.

5. Autolikidaziotik ateratzen den tributu-kuota izanen da kuota diferentzialari indarreko ekitaldiko konturako ordainketak, itzulketarako eskubidea sortzen dutenak, gehituz ateratzen dena, baldin eta negatiboa bada, foru lege honetan ezarritako moduan.

9. artikulua. Kudeaketa, diru-bilketa eta ikuskaritza.

1. Zergaren kudeaketa, diru-bilketa eta ikuskaritza Nafarroako Zerga Ogasunari dagozkio, eta hori ez da eragozpen izanen kontrolaren xede diren finantza-establezimenduen arabera sektorean eskudun diren ikuskaritza-organoekin lankidetzan aitzeko.

2. Zergadunek zergaren autolikidazioa aurkeztu beharko dute zergaldiaren osteko urteko uztailean, Ekonomia eta Ogasun Departamentuak ezarritako tokian eta moduan.

3. Autolikidazioarekin batera, erregelamendu bidez ezarritako zerrendak aurkeztuko dira, bertan adierazita Nafarroan kokatutako sukurtsal bakoitzak eta/edo entitatearen egoitza zentralak izandako azken saldoa azken lau hiruileko naturaletak bakoitzean, modalitateen arabera bereizita; ezin izanen da banku-sekretua baliatu informazio horretan datuak ezkutatzeko.

4. Nafarroan bulegoak dituen erakunde batek ez badu kasuko autolikidazioa epearen barruan aurkeztu, Nafarroako Zerga Ogasuneko kudeaketa-organoek prozedura abiarazi ahal izanen dute, eskueran dituzten datuekin behin-behineko likidazioa egiteko. Modu horretan egindako likidazioaren betearazpena ezertan ere eragotzi gabe, Nafarroako Zerga Ogasuneko organo eskudunek egiazta-pen eta ikerketa jarduketak abiarazi ahal izanen dituzte, egindako likidazioaren xede den aldiari buruz.

10. artikulua. Konturako ordainketa egin beharra.

Zergadunak behartuta daude konturako ordainketaren autolikidazio bat aurkeztera, kasuko zergaldiarena, ekitaldi bakoitzeko uztailean, aurreko zergalditik heldu den kuota likidoaren ehuneko 50ekoa.

11. artikulua. Arau-haustek eta zehapenak.

Foru lege honetan eta foru legea garatzeko araudian xedatutakoa ez betetzetik heldu diren tributu arloko arau-haustek Tributuei buruzko abenduaren 14ko 13/2000 Foru Lege Orokorrean xedatutakoaren arabera kalifikatu eta zehatuko dira.

Xedapen iragankorra.

Foru lege honetan ezarritakoa garatzeko erregelamenduzko xedapenak onetsi arte, eta kobratzea errazte aldera, Nafarroan bulegoak irekita

dituzten kreditu-erakundeak behartuta egonen dira zerga aplikatzen den lehen ekitaldiaren hurrengo urtarrilaren 30a baino lehen Nafarroako Zerga Ogasunari jakinaraztera balizko likidazioa egiteko beharrezkoak diren datuak.

Azken xedapena.

Foru lege honek Nafarroako Aldizkari Ofizialean argitara eman eta biharamunean hartuko du indarra. Betiere, 2014ko urtarrilaren 1etik aitzina hasitako zergaldietako ondorioekin exijituko da zerga.

Foru Legea, Nafarroako Toki Administrazioari buruzko uztailaren 2ko 6/1990 Foru Legearen 223. artikulua aldatzen duena.

OSOKO BILKURAK ONETSIA

Nafarroako Parlamentuak, 2014ko apirilaren 10ean egindako Osoko Bilkuran, Nafarroako Toki Administrazioari buruzko uztailaren 2ko 6/1990 Foru Legearen 223. artikulua aldatzen duen Foru Legea onetsi zuen.

Legebiltzarreko Erregelamenduko 146. artikuluan ezarritakoa betez, argitara dadin agindu da.

Iruñean, 2014ko apirilaren 10ean

Lehendakaria: Alberto Catalán Higuera

Nafarroako Toki Administrazioari buruzko uztailaren 2ko 6/1990 Foru Legearen 223. artikulua aldatzen duen Foru Legea

ZIOEN AZALPENA

Nafarroako Toki Administrazioari buruzko uztailaren 2ko 6/1990 Foru Legearen 223. artikulua arabera, ezin izanen zaie laguntza ekonomikorik eman, ez zuzenenean ezta zeharka ere, kasuan kasuko toki ogasunaren zergapeko partikular edo entitateei, baldin eta legean jaso gabeko zerga-salbuespenak egitea badakar horrek, edo toki ogasun horrekin eginiko zorrak konpentsatzea edo txikiagotzea. Toki entitatearekin dituzten zorrak premiamendu bidez kobratzeko prozedura irekita duten partikular edo entitateei ere ezin izanen zaie laguntza ekonomikorik eman.

Gaur egun, krisi ekonomikoa dela medio, familia ugari langabezian gelditu dira –epe luzerako,

askotan—. Horrek areagotu egin du familia horien zaurgarritasuna, eta hori bereziki kezagarria da familietan adingabeak daudenean. Gauzak horrela, administrazio publikoek ziurtatu beharra daukate herritarrei ez zaizkiela beharrezkoak dituzten gizarte-prestazioak ukatuko zorrak dituztelako Administrazioarekin, denbora luzean lanik gabe edo egoera zailean egotearen ondorioz. Antzeko helburuarekin onetsi zuen Nafarroako Parlamentuak 6/2013 Foru Legea, otsailaren 25ekoa, bermatutako prestazio sozialak eta ikasketetarako bekak enbargaezinak deklaratzeko dituen.

223. artikulua, bere horretan, udal laguntzarik gabe utz ditzake baliabide horien premia larrian dauden familiak.

Artikulu bakarra. Nafarroako Toki Administrazioari buruzko uztailaren 2ko 6/1990 Foru Legearen 223. artikulua aldatzen da; hain zuzen ere, paragrafo hau eransten zaio:

“Aurrekoa gorabehera, toki entitateak laguntza ekonomikoak ematen ahal dizkie berarekin dituzten zorrak premiamendu bidez kobratzeko prozedura irekita duten partikularrei, baldin eta hori espresuki jasotzen bada aipatu laguntzen gaineko arauetan, eta arau horretan adierazitako baldintza eta moduan”.

Azken xedapen bakarra. Indarra hartzea.

Foru lege honek Nafarroako Aldizkari Ofizialean argitara eman eta biharamunean hartuko du indarra.

Foru Lege proposamena, Nafarroako administrazio publikoen montepioetako funtzionarioen eskubide pasiboen araubide iragankorrari buruzko martxoaren 5eko 10/2003 Foru Legea hein batean aldatzen duena.

OSOKO BILKURAK AINTZAT HARTUA

Legebiltzarrak, 2014ko apirilaren 10ean egindako Osoko Bilkuran, erabaki zuen Nafarroako administrazio publikoen montepioetako funtzionarioen eskubide pasiboen araubide iragankorrari buruzko martxoaren 5eko 10/2003 Foru Legea hein batean aldatzen duen Foru Lege proposamena aintzat hartzea. Proposamen hori

Izquierda-Ezkerra parlamentu-taldeak aurkeztu zuen, eta 2014ko otsailaren 28ko 33. Nafarroako Parlamentuko Aldizkari Ofizialean argitaratu zen.

Iruñean, 2014ko apirilaren 10ean

Lehendakaria: Alberto Catalán Higuera

Foru Lege proposamena, Nafarroako administrazio publikoen montepioetako funtzionarioen eskubide pasiboen araubide iragankorrari buruzko martxoaren 5eko 10/2003 Foru Legea hein batean aldatzen duena.

ZUZENKETAK AURKEZTEKO EPEA

Nafarroako Parlamentuko Mahaiak, 2014ko apirilaren 14an egindako bilkuran, Erabaki hau hartu zuen, besteak beste:

Legebiltzarrak, 2014ko apirilaren 10ean egindako Osoko Bilkuran, erabaki zuen aintzat hartzea Nafarroako administrazio publikoen montepioetako funtzionarioen eskubide pasiboen araubide iragankorrari buruzko martxoaren 5eko 10/2003 Foru Legea hein batean aldatzen duen Foru Lege proposamena. Proposamen hori Izquierda-Ezkerra parlamentu-taldeak aurkeztu eta 2014ko otsailaren 28ko 33. Nafarroako Parlamentuko Aldizkari Ofizialean argitaratu zen.

Hori horrela, Legebiltzarreko Erregelamenduko 110., 111. eta 148. artikuluetan ezarritakoarekin bat, Eledunen Batzarrari entzun ondoren, hona

ERABAKIA:

1. Nafarroako administrazio publikoen montepioetako funtzionarioen eskubide pasiboen araubi-

de iragankorrari buruzko martxoaren 5eko 10/2003 Foru Legea hein batean aldatzen duen Foru Lege proposamena presako prozedurari jarraikiz izapidetzea.

2. Proposamen horri buruz irizpena emateko ahalmena Lehendakaritza, Justizia eta Barne Batzordearen esku uztea.

3. Erabaki hau Nafarroako Parlamentuko Aldizkari Ofizialean argitara dadin agintzea.

Erabaki hau argitaratzen denetik **epe bat hasiko da, 2014ko maiatzaren 5eko eguerdiko hamabietan bukatuko dena.** Epe horretan, Erregelamenduko 128. eta 148. artikuluetan ezarritakoarekin bat, parlamentu-taldeek eta foru parlamentariak zuzenketak aurkeztu ahalko dizkiote proposamenari.

Iruñean, 2014ko apirilaren 14an

Lehendakaria: Alberto Catalán Higuera

E saila:
JABELDURAK, MOZIOAK ETA ADIERAZPEN POLITIKOAK

Erabakia. Horren bidez, Nafarroako Gobernua premiatzen da eskualdeko udaletako arduradunekin bilera egin dezan, neurri urgenteak zehazteko, N-121-A errepidean istripu kopurua murrizte aldera.

OSOKO BILKURAK ONETSIA

Nafarroako Parlamentuko Osoko Bilkurak, 2014ko apirilaren 10ean egindako bileran, ondoko erabakia onetsi zuen: "Erabakia. Horren bidez, Nafarroako Gobernua premiatzen da eskualdeko udaletako arduradunekin bilera egin dezan, neurri urgenteak zehazteko, N-121-A errepidean istripu kopurua murrizte aldera." Erabakia heldu da Bildu-Nafarroa eta Aralar-Nafarroa Bai parlamentu-taldek aurkeztu zuten mozio batetik, zeina 2014ko otsailaren 7ko 23. Nafarroako Parlamentuko Aldizkari Ofizialean eman baitzen argitara.

Legebiltzarreko Erregelamenduko 114. artikuluan ezarritakoa betez, aipatu erabakia Nafarroako Parlamentuko Aldizkari Ofizialean argitara dadin agindu dut. Honakoa du testua:

"1. Nafarroako Parlamentuak Nafarroako Gobernua premiatzen du egutegian aurreikusitako aldizkako bilerak egin ditzan eskualdeko udal ordezkariekin, haiei etengabe informazioa emate-

ko N-121-A errepideko trafikoa hobetzeko eta bertan gertatzen diren istripu ugariak murrizteko helburuarekin hartuko diren neurriei buruz.

2. Nafarroako Parlamentuak Nafarroako Gobernua premiatzen du azterlan bat egin dezan istripu ugariko tarteetako arrisku faktoreei buruz, eta tarte horietako segurtasuna bermatzeko behar diren egokitzapenak egin ditzan.

3. Nafarroako Parlamentuak Nafarroako Gobernua premiatzen du abiadura-mugak murriz ditzan arriskutsuak izan daitezkeen puntuetan, eta muga horiek betetzen direla zaindu dezan.

4. Nafarroako Parlamentuak Nafarroako Gobernua premiatzen du alderdi horretako beharraz egiaz erantzunen dien garraio publiko bat susta dezan".

Iruñean, 2014ko apirilaren 10ean

Lehendakaria: Alberto Catalán Higuera

Erabakia. Horren bidez, Nafarroako Gobernua premiatzen da Nafarroako memoria historikoaren tokien katalogoa sor dezan eta Sartagudako Memoriaren Parkea lehenbizikoa izan dadin Nafarroako memoria historikoaren toki deklaratu izaten.

OSOKO BILKURAK ONETSIA

Nafarroako Parlamentuko Osoko Bilkurak, 2014ko apirilaren 10ean egindako bileran, ondoko erabakia onetsi zuen: “Erabakia. Horren bidez, Nafarroako Gobernua premiatzen da Nafarroako memoria historikoaren tokien katalogoa sor dezan eta Sartagudako Memoriaren Parkea lehenbizikoa izan dadin Nafarroako memoria historikoaren toki deklaratu izaten.”

Legebiltzarreko Erregelamenduko 114. artikuluan ezarritakoa betez, aipatu erabakia Nafarroako Parlamentuko Aldizkari Ofizialean argitara dadin agindu dut. Honakoa du testua:

“1. Nafarroako Parlamentuak Nafarroako Gobernua premiatzen du Nafarroako memoria historikoaren tokien katalogoa sor dezan, azaroaren 16ko 33/2013 Foru Legearen 9. artikulua 2. idatz-zatian xedatzen denari jarraikiz.

2. Nafarroako Parlamentuak Nafarroako Gobernua premiatzen du Sartagudako Memoriaren Parkea izan dadin Nafarroako memoria historikoaren toki deklaratu lehena, 33/2013 Foru Legeko 9.2 artikuluan ezarritako izapide eta proposamen loteslea alde aurretik eginda; izan ere, parkeak errekonozimendu eta babes ofizialik handiena du, foru lege horretako 15.1 artikuluan ezarritakoarekin bat.

3. Nafarroako Parlamentuak Nafarroako Gobernua premiatzen du Sartagudako Memoriaren Parkea mantentzeaz eta hobetzeaz arduratu dadin, Nafarroako Aurrekontu Orokorren kargura.”

Iruñean, 2014ko apirilaren 10ean

Lehendakaria: Alberto Catalán Higuera

Erabakia. Horren bidez, Nafarroako Parlamentuak ezinbestekotzat jotzen du fundazioen kentzeak eraginik ez izatea auditoriak egiteko premian eta betebeharrean, eta Nafarroako Gobernua premiatzen du Kontuen Ganberaren esku jar dezan dagoen informazio guztia.

OSOKO BILKURAK ONETSIA

Nafarroako Parlamentuko Osoko Bilkurak, 2014ko apirilaren 10ean egindako bileran, ondoko erabakia onetsi zuen: “Erabakia. Horren bidez, Nafarroako Parlamentuak ezinbestekotzat jotzen du fundazioen kentzeak eraginik ez izatea auditoriak egiteko premian eta betebeharrean, eta Nafarroako Gobernua premiatzen du Kontuen Ganberaren esku jar dezan dagoen informazio guztia.”

Legebiltzarreko Erregelamenduko 114. artikuluan ezarritakoa betez, aipatu erabakia Nafarroako Parlamentuko Aldizkari Ofizialean argitara dadin agindu dut. Honakoa du testua:

“Nafarroako Parlamentuak ezinbestekotzat jotzen du fundazioen kentzeak eraginik ez izatea auditoriak egiteko premian eta betebeharrean, Parlamentu honek adierazi bezala. Hori dela-eta, Nafarroako Gobernuari exijitzen dio Kontuen Ganberaren esku jar dezan eskatutako eta egiteke dauden auditoriak egin ahal izateko dagoen informazio guztia.”

Iruñean, 2014ko apirilaren 10ean

Lehendakaria: Alberto Catalán Higuera

Erabakia. Horren bidez, Nafarroako Gobernua premiatzen da azter dezan Belaten barna Iruñetik Frantziara doan N-121-A errepideko tarte osoa bikoizteko aukera.

OSOKO BILKURAK ONETSIA

Nafarroako Parlamentuko Osoko Bilkurak, 2014ko apirilaren 10ean egindako bileran, ondoko erabakia onetsi zuen: "Erabakia. Horren bidez, Nafarroako Gobernua premiatzen da azter dezan Belaten barna Iruñetik Frantziara doan N-121-A errepideko tarte osoa bikoizteko aukera."

Legebiltzarreko Erregelamenduko 114. artikuluan ezarritakoa betez, aipatu erabakia Nafarroako Parlamentuko Aldizkari Ofizialean argitara dadin agindu dut. Honakoa du testua:

"Parlamentuak Nafarroako Gobernua premiatzen du:

1. N-121-A errepideko Iruña-Frantzia tarte osoa sartzera Belateko tunelen bikoizketari buruz 2014an eginarazi asmo duen azterlan informatiboa.

Azterlan horrek aukera ezberdinak aztertu beharko ditu, bai eta, besteak beste, obraren bide-

ragarritasuna, gizartearen, ekonomiaren, ingurumenaren eta lurraldearen ikuspuntutik.

2. Bere konpromisoa erakustera, Belaten barna doan Iruñetik Frantziarako errepidean galtzada bikoizta paratzeko, bai bikoizketa eginez, bai N-121-A errepidean autobia bat eginez, egindako azterlanen arabera.

3. Udal ordezkariak, entitate profesionalek edo bestek proiektu horri egiten ahal dizkioten proposamenak aintzat hartzera.

4. Gipuzkoako Aldundiarekin harremanetan jartzera, N-121-A errepide osoaren bikoizketa lortzeko.

5. Azterlan horren ondorioak sartzera errepideen planaren berrikuspenean edo etorkizunean egiten diren planetan."

Iruñean, 2014ko apirilaren 10ean

Lehendakaria: Alberto Catalán Higuera

Erabakia. Horren bidez, Nafarroako Gobernua premiatzen da Trenasa enpresaren eta trenbide-sarearen arteko lotura-trenbideak ukitutako familien etxebizitzak eros ditzan.

OSOKO BILKURAK ONETSIA

Nafarroako Parlamentuko Osoko Bilkurak, 2014ko apirilaren 10ean egindako bileran, ondoko erabakia onetsi zuen: "Erabakia. Horren bidez, Nafarroako Gobernua premiatzen da Trenasa enpresaren eta trenbide-sarearen arteko lotura-trenbideak ukitutako familien etxebizitzak eros ditzan."

Legebiltzarreko Erregelamenduko 114. artikuluan ezarritakoa betez, aipatu erabakia Nafarroa-

ko Parlamentuko Aldizkari Ofizialean argitara dadin agindu dut. Honakoa du testua:

"Nafarroako Parlamentuak Nafarroako Gobernua premiatzen du Trenasa enpresaren eta trenbide-sarearen arteko lotura-trenbideak ukitutako familien etxebizitzak eros ditzan."

Iruñean, 2014ko apirilaren 10ean

Lehendakaria: Alberto Catalán Higuera

Erabakia. Horren bidez, Nafarroako Gobernua premiatzen da ehuneko ehun finantza ditzan haur hezkuntzako lehen zikloko udal titulartasuneko eskolak.

OSOKO BILKURAK ONETSIA

Nafarroako Parlamentuko Osoko Bilkurak, 2014ko apirilaren 10ean egindako bileran, ondoko erabakia onetsi zuen: “Erabakia. Horren bidez, Nafarroako Gobernua premiatzen da ehuneko ehun finantza ditzan haur hezkuntzako lehen zikloko udal titulartasuneko eskolak”

Legebiltzarreko Erregelamenduko 114. artikuluan ezarritakoa betez, aipatu erabakia Nafarroako Parlamentuko Aldizkari Ofizialean argitara dadin agindu dut. Honakoa du testua:

“Nafarroako Parlamentuak Nafarroako Gobernua premiatzen du:

1. Udalei hitzarmen bidez eman diezaien aplikatutako formulatik heldu den zenbatekoaren ehuneko ehun (aplikatu beharreko urteko modulua ken toki entitateak egin beharreko ekarpena, ken eskolatzearagatik familiek egindako ekarpena).

2. Ekarpene hori ez dadin geldi, Hezkuntza Departamentuak nahi duen bezala, “funts gehigarriak” egotearen ala ez egotearen baitan, baizik eta bermatuta egon dadila eta adostutako moduan eta epean ordain dadila”

Iruñean, 2014ko apirilaren 10ean

Lehendakaria: Alberto Catalán Higuera

G saila:
TXOSTENAK, DEIALDIAK ETA PARLAMENTUKO INFORMAZIOA

Nafarroako Parlamentuko ordezkariak izendatzea Memoria Historikoaren arloko Koordinazio Batzorde Teknikoan.

Nafarroako Parlamentuko Lehendakaritza, Justizia eta Barne Batzordeak, 2014ko apirilaren 11n egindako bilkuran, ondoko erabakia hartu zuen:

“**1.** Memoria Historikoaren arloko Koordinazio Batzorde Teknikoan foru parlamentari hauek izendatzea Nafarroako Parlamentuko ordezkari:

Víctor Rubio Martínez jauna

Santos Cerdán León jauna

2. Erabaki honen berri ematea Nafarroako Gobernuari eta Nafarroako Parlamentuko Aldizkari Ofizialean argitara dadin agintzea”

Iruñean, 2014ko apirilaren 11n

Lehendakaria: Alberto Catalán Higuera
